

ZBOG SUMNJE U POVREDU TAJNOSTI POSTUPKA

SIPA upala u stan Šejle Turković

D. TOVILOVIĆ

SARAJEVO - Pripadnici SIPA juče u ranim jutarnjim satima pretresli su stan Šejle Turković, supruge osuđenog Zijada Turkovića, zbog sumnje u krivično djelo povreda tajnosti postupka.

"Osumnjičena je neovlašteno objavljivala materijale iz postupka koji se vodi pred Sudom BiH. Pretres stambenog objekta i drugih prostorija izvršen je po naredbi Suda BiH i Tužilaštva BiH, a pronađeni su i privremeno oduzeti određeni predmeti koji mogu poslužiti kao dokaz u daljem postupku", navodi se u saopštenju SIPA. Iz ove agencije, navodeći njene inicijale, dodaju kako će Sudu i Tužilaštvu BiH dostaviti odgovarajuće izvještaje o realizaciji predmetne naredbe s privremeno oduzetim predmetima.

Međutim, Šejla Turković sumnja da posljednji pretres ima bilo kakve veze s objavljenim materijalima. Kako je rekla, "prije desetak dana tužiocu EULEKS-a predala je dokument koji je svojom rukom popunio Fahrudin Radončić, nakon čega je došlo do provale u njenu kuću, a što je i evidentirano u policiji".

Juče od Radončića nismo uspjele dobiti komentar na ove optužbe



jer nam se nije javljao na telefon.

"Pripadnici SIPA su došli s naredbom da se pregleda moj kompjuter jer je navodno neko s moje IP adrese 2013. godine postavio snimke sa suđenja Zijadu Turkoviću. Ako su već zbog toga došli, pitam se zašto su im bile potrebne dvije godine za to", kaže Turkovićeva. Dodaje kako je njen računar veoma loš i star te da nije imala tehničke mogućnosti ni znanje da to uradi. "Kada su vidjeli s kakvim su nalogom došli, a kakav je moj računar, mislim da je i njih bilo sramota", kaže Turkovićeva.

Kako nam je kazala, tokom pretresa su zaplijenjeni i izuzeti dokumentacija i kompakt-diskovi koji su trebali da posluže za apelaciju povodom presude njenom suprugu, a čime je cijeli proces sada otežan.